

Iliniartitaanermut ataatsimiititaliap suleriaasia

Ilinniartitaarnermut ataatsimiititaliap ataatsimiittarneri

§ 1. Ataatsimiititaliap ataatsimiinneri tamanut ammasuunngillat, tak. aqutsinermi inatsisip § 28-ia imm. 4

Imm. 2. Ataatsimiititaliap kommunimi sulisut ataatsimiinnermini ataatsimiititaliami allat-sissatut il.il. peqataaqqusinnaavai. Ataatsimiititaliap inuit allat matumanilu kom-munalbestyrelsimi ilaasortat ilanngullugit ataatsimiinnermini peqataaqqusinnaa-vai, tassa suliamut paasissutissiissuteqarsinnaanermi tamanna kissaatiginartinne-qarpat.

§ 2. Ataatsimiititaliami ilaasortaq ataatsimiinnermi peqataasinnaangikkuni, tamanna kingusinner-paamik ataatsimiinnissaq ullunik marlunnik sioqqullugu ataatsimiititaliap siulittaasuanut nalunaa-rutigissavaa. Aalajangiinernik imaqarniliornerni tamatigut ilaasortat kikkut ataatsimiinnermi peqa-taanginnerat ilanngunneqartassaaq.

Ataatsimiititaliap siulittaasuanik toqqaaneq

§ 3. Ataatsimiititaliap ataatsimiinnerani siullermi ataatsimiititaliap siulittaasussaminik taassumalu tullersortissaanik toqqaassaaq. Toqqaanerit immikkoortillugit ingerlanneqassapput, nalinginnaasu-millu amerlanerussuteqarneq tunngavigalugu aalajangiisoqassalluni. Ataatsimiititaliap siulittaasua-nik toqqaaneq borgmester-imik aqunneqassaaq.

Ataatsimiigiaqqusinerit oqaluuserisassallu nassiussuunneri

§ 4. Ataatsimiititaliamut apeqquteqaatit allakkatigut saqqumiunneqartassapput. Nalinginnaasumik ataatsimiinnissaq ullunik arfineq-pingasunik sioqqullugu suliamik allaganngorlugu suliassanngortitsisimappat, ataatsimiititaliap siulittaasuata suliassaq taanna ataatsimiinnermi siullermi oqaluuserisassanut ilanngutissavaa.

Imm. 2. Nalinginnaasumik ataatsimiinnissaq ullunik ulluinnaasunik sisamanik sioqqullugu Siulittaasup oqaluuserisassat ilaasortanut tamanut nassiunneqarnissaat isumagisassavaa. Oqaluuserisassat ataasiakkaarlutik sapinngisamik naatsumik ersarissumillu suliamut tunngasutigut oqaasertaligaassapput. Ataatsimiinnerni tamani oqaluuserisassat borgmesterimut kommunimilu pisortaanermut paasissutissatut ingerlatinneqartassapput.

Imm. 3. Oqaluuserisassat ammasunut matoqqasunullu immikkoortinneqartassapput. Ma-

toqqasunut tunngasut makkuupput

- 1) suliani inunnik ataasiakkaanik inuttut atugaasigut nalilersuiffiusussat
- 2) suliat illuutini pisinernut tunisinernullu tunngasut
- 3) illuutini suliaqarnermi missiliuutit neqeroorutillu kiisalu nioqquteqarnerit.

Imm. 4. Immikkut ataatsimiigiaqqusinermi sapinngisamik annerpaamik ataatsimiititaliap siulittaasuata suna ataatsimiinnissami pineqassanersoq pillugu ilaasortat paasisutissinniartassavai.

Aalajangiisinnaassuseq, ataatsimiinnermi aqutsineq suliallu saqqummiuttarnissaat

§ 5. Ataatsimiititaliami ilaasortat ikinnerpaamik affai peqataappata, ataatsimiititaliaq aalajangiisinnaassuseqarpoq.

Imm. 2. Ataatsimiititaliaq, ilaasortat ilaannik piumaffigineqaruni, ilaasortap ataatsimiinnermi attaveqaatit atorlugit peqataanissaa aalajangiiffigisinnaavaa.

§ 6. Ataatsimiititaliap siulittaasuata, peqataanngippallu siulittaasup tulliaata, ataatsimiinnerit aquttassavai. Ataatsimiinnerit aqunneqarnerini toqqissisimasumillu ingerlanneqarnissaannik apeqqusiinerit ataatsimiititaliap siulittaasuata aalajangiiffigisassavai. Taamatuttaaq suliani taasissuteqassatillugu, qanoq isikkuliinissaq ataatsimiititaliap siulittaasuata aalajangiiffigisassallugu.

Imm. 2. Kinaluunniit oqaaseqarusukkuni, ataatsimiititaliap siulittaasuanut saaffiginnissaaq, taassumalu ilaasortat oqaaseqartussat saaffiginninnerat tunngavigalugu tulleriaassavai. Arlallit oqaaseqarniarlutik ataatsikkut saaffiginnippata, ataatsimiititaliap siulittaasuata oqaaseqarnissaanni qanoq tulleriinnissaat aalajangissavaa. Oqaaseqartut taamaallaat ataatsimiititaliap siulittaasuanit unitsinneqarsinnaapput.

Imm. 3. Ilaasortap kialluunniit toqqissisimanissamik siulittaasup piumasarisaa ataqquisusaavaa. Ilaasortap ataatsimiinnerup ingerlanerani marloriarluni toqqissisimaqquneqarsimappat, ataatsimiititaliap siulittaasuata siunnersuuteqarneratigut ataatsimiinnermi ilaasortaq oqaaseqaqqissanngitsoq ataatsimiititaliap aalajangiiffigisinnaavaa.

§ 7. Ataatsimiinnermi ataatsimiissutissat ataatsimiititaliap siulittaasuata aalajangiineratut tulleriiaarneqassapput, taassumalu oqaluuserisassat tulleriiaarsimaneri allanngortissinnaallugit.

Imm. 2. Ilaasortaq kinaluunniit ataatsimiinnerup aallartinnerani oqaluuserisassat pillugit oqaaseqarumasinnaavoq, matumani oqaluuserisassat tulleriiaarsimaneri aamma eqqarsaatigalugit.

Imm. 3. Suliaq oqaluuserisassanut nassiunneqarsimasunut ilanngunneqarsimanngitsoq

oqaluuserineqarsinnaangilaq, ilanngunnissaalu tamanit
isumaqatigineqanngippat, imaluunniit suliap aalajangiiffiginissaa
nalorninaateqanngippat suliarluunniit kinguartinneqarsinnaanngippat.

§ 8. Suliaq inatsisitigut allatut aalajangiiffigineqarsimanngippat ataasiaannarlugu suliarineqartas-
saaq, ataatsimiititaliialluunniit suliap marloriarlugu suliarinissaa aalajangiiffiginngippagu.

Imm. 2. Siullermeerlugu suliap suliarinerani suliaq sukumiissumik suliarineqassanersoq
taasissutigineqartassanngilaq, taamaallaalli aappassaaneernissaa apeqqut
taasissutigineqassalluni. Ilaasortap kialluunniit pineqartumut oqaaseqarnissani
pisinnaatitaaffigivaa, tassa suliap aappassaaneerneqarnissaminut ingerlateqqinne-
qarnissaa eqqarsaatigalugu. Siullermeernera aappassaaneernalu ulloq ataaseq
pisinnaanngillat.

Imm. 3. Suliaq marloriarlugu suliarineqassappat, siullermeernerani pappialat atukkat sa-
pinngisamik ilaasortanut misissugassanngorlugit saqqummiunneqassapput, taak-
kuluunniit akornanni ingerlaartinneqarlutik.

§ 9. Ataatsimiititaliami ilaasortap kialluunniit aalajangiinerup piviusunngortinneqarnissaa unitsis-
sinnaavaa ataatsimiinnermi oqaaseqaruni suliasap kommunalbestyrelsimut tamarmiusumut saq-
qummiunneqarnissaa kissaatigigini. Tamannali atussanngilaq aalajangiinernut inatsisit malillugit
ataatsimiititalianut ataavartunut isumagisassanngortinneqartunut.

§ 10. Ataatsimiititaliami siulittaasup ataatsimiititaliaq sinnerlugu suliasat kinguartinneqarsinnaan-
ngitsut imaluunniit nalornisoorutaasinnaanngitsut aalajangiivigisinnaavai. Suliasani inatsisi-
liornikkut ataatsimiititaliamut suliasanngortitaasimanngitsuni kinguartinneqarsinnaanngitsunili
ataatsimiititaliami siulittaasup aalajangiitinnani borgmesteri ilisimatittassavaa, tamannali
atuutinngilaq suliasani ataatsimiititaliamut suliasanngortinneqarsimasuni.

Ilaasortat ataatsimiinnermi taasinermilu peqataanerat

§ 11. Ataatsimiititaliami ilaasortaq suliame aalajangersimasumi peqataasinnaanngilaq, tassa

- 1) imminermut inuttut aningaasatigulluunniit suliap qanoq inerneqarnissaa soqutigi-
saqarfigiguniuk suliamiluunniit massakkut siusinnerusukkulluunniit soqutiginnit-
tumut sinniisuusimaguni,
- 2) katissimallugu aappariikkunik, siulimikkut/kinguaamikkut ningaariikkunik
/sakiatsiariikkunilluunniit qatanngutimiluunniit kinguaavisigut allatigulluunniit
qanitariittuunikkut suliap qanoq inerneqarnissaa soqutigisaqarfigiguniuk suli-
amiluunniit massakkut siusinnerusukkulluunniit soqutiginnittumut sinniisuusi-
maguni,

- 3) ingerlatseqatigiiffiup siulersorneqarnerani peqataaguni allatigulluunniit peqatigiiffimmut qanittumik attuumassuteqaruni, tamatumanilu suliap qanoq inerpeqarnissaa soqutigisaralugu,
- 4) suliassaq pisortat suliffeqarfiutaannut allamut atatillugu naammagittaalliutaappat imaluunniit misissuisutut nakkutilliisuuffittulluunniit suliassaappat, pineqartorlu pisorta qarfimmuq tassunga atatillugu pineqartumi aalajangiinnermi pineqaatissii- nermiluunniit peqataasimaguni, imaluunniit
- 5) pineqartup kinaassusersiortuunngitsumik isummersinnaanissaanik apeqqusii- nissamut pequtaasinnaasunik takussutissaqarpat.

Imm. 2. Suliamili peqataanissaq akornutissaqanngilaq, tassa soqutiginninnerup qanoq it- tuunera annertussusialuunniit eqqarsaatigalugit, suliassaq qanoq ittuunera pine- qartulluunniit suliamik suliaqarnera suliami aalajangiinnermi pineqaatissii- samik sunniuteqaateqarnissaa mianernartoqanngippat.

Imm. 3. Suliamut atatillugu peqataasinnaanngitsoq, suliami aalajangiinnermi pineqaatissii- samik sunniuteqaateqarnissaa mianernartoqanngippat.

§ 12. Ilaasortap peqataasinnaanerminut atatillugu nalornisooruteqaruni tamatuminnga ataatsimiiti- taliaq ilisimatissavaa.

Imm. 2. Ataatsimiititaliap ilaasortap soqutiginninnerata suliami peqataasinnaaneranut qa- noq attuumassuteqartiginersoq, tassa pineqartoq suliap ataatsimiititaliami saq- qummiunneqarnerani, suliarineqarnerani taasissutaanerani peqataasinnaan- nginneranik kinguneqassanersoq, aalajangissava. Taamaattoqarpat pineqartoq suliap saqqummiunneqarnerani, suliarineqarnerani taasissutiginneqarneranilu ini qimattariaqassavaa, illuatungaattigulli ilaasortaq suliamut attuumassuteqarnerata ataatsimiititaliami suliarineqarnerani taaseqataasinnaaneranillu peqataasinnaal- luni.

Taasissuteqarneq, allannguutissamik suliallu ingerlannerani allannguutissamik siunnersuuteqaqqinnerit

§ 13. Taasinerit ima ingerlanneqartassapput, ilaasortat issiavimminniit nikuittarlutik, nappaasarlutik imaluunniit arlaatigut paatsoorneqarsinnaanngitsumik siunnersuummut isumaqataanerlutik isuma- qataannginnerlutilluunniit nalunaarutigalugu.

Imm. 2. Aalajangiinnerit tamarmik amerlanerussuteqarnikkut pisassapput.

Imm. 3. Ataatsimiititaliap siulittaasua naliliiguni, suliap inerpeqarnissaa ima nalunaatsigi-

soq, taasissutigineqarnissaa pisariaqarani, suliamik nammineq paasinninnini aalajangiinissamilu isummernini oqaatigissavai. Tamatumalu kingorna ilaasortat arlaata suliap taasissutigineqarnissaa piumasarinngippagu, ataatsimiititaliap suliami nammineq isummani naapertorlugu aalajangiisoqarnera oqaatigissavaa.

Imm. 4. Qinersinerit allakkatigut taasinnikkut pisassapput, taasiffissallu siulittaasumit isumagineqarlutillu tunniunneqartassallutik. Ataatsimiititaliap siulittaasuata nalornissutiginnikkuniuk ataatsimiititaliap qinigassanngortittoq aalajangersimasoq toqqarniaraat toqqaqqinniaaalluunniit, taava siunnersuutigisinnavaa, pineqartoq allakkatigut taasissutaanngikkaluamik toqqagaassasoq. Taamaattoqartillugu ilaasortat arlaata taasinnissaq piumasaqaatiginngippagu, qinigassanngortittut siunnersuut toqqagaasutut paasineqassaaq.

§ 14. Allannguutissatut siunnersuutit suliallu ingerlanerani allannguutissatut siunnersuuteqaqqinnerit saqqummiunneqarsinnaapput, taasinnissap aallartinnginnerani, taamaasillunilu suliap saqqummiunneqarnera siullermeernaluunniit patsisiginiarneqarsinnaanani, tassa suliaq marloriarlugu suliasaappat, immikkoortorli 2 takuuk.

Imm. 2. Ataatsimiititaliap suliani marloriagassani aalajangiisinnaavoq, allannguutissatut siunnersuutit piffissaliiffigineqassasut tunngaviusumillumi aamma suliap ingerlannerani allannguutissatut siunnersuuteqaqqinnerit, taamaattoqartillugulu piffissaq qaangiutereersoq saqqummiunneqarsinnaanatik.

Imm. 3. Allannguutissatut siunnersuutit suliallu ingerlanneqarnerani allannguutissatut siunnersuuteqaqqinnerit ilaasortanut aatsaat suliap aappassaaneernerani saqqummiunneqarpata, ataatsimiinnerup aallartinnerani ataatsimiititaliap siulittaasuata ataatsimiinneq aallarnarlugu tunniunneqarsimappata nalunaarutigissavai. Ataatsimiititaliap siulittaasuata allannguutissatut siunnersuutini taasinerit qanoq tullerriaarneqarnissaat aalajangissavaa, tamatigulli tunngaviusumik siunnersuutip taasissutiginninnerani taakku ingerlanneqartassapput.

Amerlanerussuteqarluni toqqaaneq

§ 15. Amerlanerussuteqarluni toqqaanerni, toqqagassani ilaasortanit peqataasunit amerlanernit toqqagaasoq qinigaassaaq. Taama amerlanerussuteqartoqanngippat, taava taaneqartunit amerlanerit marluk aallaavigalugit taasisoqassaaq. Toqqaasut amerlaqatigiippata makitsinikkut aalajangiineq pissaaq.

Aalajangiinernik allattaavik

§ 16. Ataatsimiititaliap aalajangiineri ataatsimiinnerup ingerlanerani aalajangiinernik allattaavinnut ataatsimiititaliap allattaanit allanneqartassapput. Ataatsimiititaliap siulittaasuata oqaatigissavaa, qanoq allanneqassanersut.

Imm. 2. Ilaasortap allatut isumaqarnini naatsumik allatsissinnaavaa.

Imm. 3. Aalajangiinnernik allattaavik ataatsimiinnerit naammassineri tamaasa, allanneqarsimasut atuarneqareernerisigut, ilaasortanit ataatsimiinnermi peqataasunit tamanit atsiorneqassaaq. Ilaasortat namminneq taasinertik innersuussutigalugu allatigulluunniit patsisissarsiorlutik aalajangersakkanut atsiorumangissinnaanngillat. Ataatsimiititaliap siulittaasuata aalajangersakkat allattorsimaffiat ataatsimiinnermi peqataasunit atsiorneqarsimanissaa qularnaassavaa.

Imm. 4. Ataatsimiinnermit ammasumiit aalajangikkat tamanut takusassiarineqassapput.

Suleriaatsip aalajangersagaannik paasinninneq

§ 17. Ilaasortaq kinaluunniit ataatsimiititaliap siulittaasuata suleriaatsip qanoq paasineqarnissaa pillugu aalajangiineranik ataqqinnittussaavoq, apeqqusiinerli ataatsimiititaliap tullianik ataatsimiinnissaanut ingerlateqqinneqarsinnaalluni.

Suleriaatsimik allannguuteqartitsineq

§ 18. Suleriaatsimik allannguuteqartitsineq tapiliussaqaqarnerrilluunniit ataatsimiinnermi nalinginnaasumi ataasiarlugu ingerlanneqassaaq.

§ 19. Suleriaaseq una atuutilerpoq ulloq 04. april 2022.

Ilinniartitaarnermut ataatsimiititaliap siulittaasua



Evelyn Frederiksen